

L'Europa medievale

In sguard talian sin diesch seculs

DA GUIU SOBIELA-CAANITZ

■ **Millennis da traffic tranter Italia e Germania han bullà la cultura ruman-tscha. L'istorgia en quatter toms publicada l'onn 2000 per talian e tudestg da la Societad per la perscrutaziun da la cultura grischuna ans infurmescha davart ils impuls retschavids en Rezia dapi la conquista romana.** Ma co statti cun ils pajais da provegnientscha da lezzas influenzas? Davart lur passà ans riva cunzunt scleriment da la Bassa, be darar da l'Italia, malgrà ils impuls multifars che quest pajais ha dà a la cultura ruman-tscha. Igl è gist cumpari in manual talian d'istorgia medievale (1) cun 300 paginas, 28 chartinas istoricas, in register da persunas ed in da toponims. Mintgin dals trenta capitels contegn ina bibliografia che pussibilitescha da sa profundar. Il tom «vul corresponder a las pretensiuns novas da la didactica universitara, (...) dentant era cuntanscher in public pli vast che giavischia d'enconuscher ils resultats ils pli moderns da l'istoriografia ed ils maletgs novs dal temp medieval ch'ella ha creà» (p. 2). L'autur, Massimo Montanari (Universitad da Bologna), tracta vaira bain il svilup da la Baseligia catolica dal quart al quattordeschavel secul ed il passà da l'Italia, la Frantscha, l'Engalterra e la Penisla iberica, plinavant era la naschientscha ed il svilup da l'imperi enfin a Carl IV (1316–1378). Da l'autra vart ston ins crititgar mancanzas da lezza ovra taliana areguard l'autra riva dal Mar adriatic.

Ils ideals dals muntgs

Gia il segund chapitel distingua cleramain «las duas vias da cristianisaziun» (p. 11), pia «l'ecclesiastica, enturn baselgias urbanas dominadas da l'aristocrazia ed in'ierarchia sacerdotala cun structurars rigurusas, (...) e l'individuala, quella dals muntgs, (...) apostels principals da las populaziuns ruralas che vivevan lunsch davent da las citads» (pp. 11–12). Il chapitel 16, entitulà «Il monachissem nov e la refurma da la baseligia (10avel–13avel tschientaner)», rapporta da moviments ch'ins enconuscha uschiglio pauc: «En l'Italia dal 10avel ed 11avel secul (...) è naschidas claustras pitschnas che refusavan la transfurmasziun da bleras abazias benedictinas en centers da pussanza e levan reanimar ils ideals dals emprims muntgs (...). Romuald da Ravenna per exempel (...) ha fundà en l'Italia centrala varsaquants

eremitadis che garantivan amplamain isolaziun ed ascesa individuala (...). Lezza furma da monachissem ha sa derasada en Frantscha vers la fin da l'endischavel secul, sco reacziun encunter il grond luxus che distingueva [l'abazia da] Cluny. Sper Grenoble [lezza giada en l'imperi, G. S.-C.] è naschida la Chartusa gronda; ils chartusians deditgavan ina gronda part dal di ad urar solitaris en lur cellas» (p. 136).

Cumbatter ils musulmans

En quel temp ha papa Gregor VII (Idebrando di Soana OSB, 1020–1085) stgaffi «in model da baseligia 'monarchica' ed ierarchica che viva cun varsaquants midadas enfin ad oz. Era l'organisaziun actuala dal clerus catolic, basada sin il celibat ed ina separaziun clera tranter laics e spirituals areguard lur moda da viver, deriva dal temp da lez papa, sco era la ruptura cun la cristianadad orientala» (p. 141). Il chapitel 19 porta il titel significativ: «La naschientscha da la chavallaria e l'invenziun da las cruschadas (11avel–13avel tschientaner)» (p. 164). Ils pelegrinadis a S. Giachen da Compostela «en l'intschess da l'uscheditga 'reconquista', (...) promovids dals muntgs da Cluny, (...) manavan millis cristians gist nua ch'ins facheva ina guerra d'expansiun encunter ils musulmans. Papa Alexi II ha sustegni directamain la 'reconquista' (...) declerond perdunads ils putgads da quels che cumbattevan ils musulmans» (pp. 168–169). Per il 13avel tschientaner menziuna Montanari la «cruschada» proclamada 1208 encunter ils eretics da la Frantscha dal sid e «che ha chaschunà in mazzament da la populaziun» (p. 230), sco era quella encunter ils pievels pajauns che vivevan tranter il Golf da Finlanda e la sbuccada da l'Oder. Il chapitel 25 («Papat universal e Stadi da la baseligia, 12avel–14avel secul», p. 219) rapporta da normas stipuladas en la segunda mesadad dal 13avel secul areguard l'elecziun dal papa entras ils cardinals e la nominaziun dals uestgts entras il papa, dumondas anc adina actualas.

Da Sicilia a Vaniescha

Pliras paginas davart il temp medieval en l'Italia dattan occasiun da savair dapi. Tgi che ha visità Ravenna sa ch'il num da Romagna deriva da l'Imperi roman d'orient (Constantinopel). Pli durabla, enfin a l'endischavel secul, è stada dentant sia dominaziun en Puglia e

Calabria; donn ch'il manual na resguarda betg l'architettura e na di perquai nagut da las baselgias bizantinas en questas regiuns. Domaduas, ma cunzunt era la Sicilia è stada occupada en il novavel tschientaner da musulmans vegnids da Tunisia e che han er invadi e sblundergià ritgas abazias talianas e schizunt Roma. Prinzis cristians da Puglia han clamà chavaliers da Normandia che han lura conquistà la Sicilia ed ina gronda part da l'Italia dal sid. 1130 è lur duca Roger (1095–1154) vegni encurunà retg da Sicilia. Ses biadi Fadri (1194–1250), «ina da las persunalitads principalas da l'entir passà da l'Occident» (p. 203), il Federico da noss Giovanni Netzer, è vegni encurunà retg da Sicilia 1208, da Germania 1212 ed imperatur 1220. Lezza insla è pia vegnida in element essenzial da la politica europeica; dapi 1409 è la restada unida cun ils stadis catalans. Pli novas per il public da l'Europa mesauna èn las paginas davart il creschament territorial da Firenze, Milaun e Vaniescha, confermà 1454 dal patg da Lodi. Impurtant per la Rezia era che Vaniescha tegneva Bergamo, Brescia, il Veneto e Friul.

Da Londra a Granada

Montanari punctuescha bain las etappas dal svilup instituziunal en l'Engalterra. La Magna Charta (1215) «ha reconuschi ils privilegis da citads e baselgias e da la noblezza» (p. 147). Lez document «ha dà ina funcziun relevanta a la radunanza da delegads da la noblezza e dal clerus; ses parairi è vegni declerà liant areguard l'introducziun da taglias novas. Dentant han ins entschatt pir en il temp d'Eduard I (retg 1272–1307) a convocar il parlament en moda pli u main regulara (...). Enamez il 14avel tschientaner ha sa fatga valair sia partiziun en Chombra dals signurs e Chombra bassa. Ils commembers da l'emprima represchentavan las stirpas noblas las pli veglias, quels da l'autra chombra (...) la noblezza mesauna e bassa sco er auters notabels, elegids da contadis e citads» (p. 261). Il manual resumescha lura las ostilitads dal 15avel secul tranter l'Engalterra e Frantscha e lur vieuta maidudida «pervi d'ina giuvna pura da Lorena, Jeanne d'Arc, animada d'ina religiusadad profetica (...). Ella ha sa messa a la testa da truppas ed ha pudì debloccar la citad d'Orléans, instradond ina reconquista entras victorias relevantas (...). La schuldada dal duca da

Burgogna, allia cun l'Engalterra, ha dentant piglià Jeanne e l'ha consegnada als Anglais che l'han fatga sentenziar d'ina dretgira ecclesiastica sco stria. 1431 è la morta sin in stgandler, ma il svilup da la guerra era oramai decidi» (p. 263). Montanari descriva la Penisla iberica a la fin dal tschientaner en moda bunamain exemplara: «1469 ha Isabella, ertavla dal tron castiglian, maridà Ferdinand, ertavel da l'Aragón [pia era da Catalogna, Mallorca, Sardegna, Sicilia e València, G. S.-C.]. Domaduas curunas eran unidas persunalmain, ma anc adina cun atgnas instituziuns. Ins ha pia empruvà da duvrar la religiun sco chit, rinfurzond il spiert da cruschada encunter ils 'inimis da la cristianadad'. Perquai han ils 'monarchs catolics' sustegni il cumbat encunter l'eresia, la persecuziun dals gidieus (bandischads 1492) e la reanimaziun da la 'reconquista' cun la fin, era 1492, dal reginam da Granada, davos pajais musulman en la penisla» (pp. 266–267).

Il Mar adriatic unescha oz puspè

Il manual è vegni stampà a Bari, chapitala da Puglia, nua ch'ils frars Laterza han fundà 1901 la chasa editura che l'ha publicat. Bari è situà a 200 km en lingia directa da Dubrovnik (Croazia). La distanza tranter la riva pugliaisa e quella da l'Albania è da be 72 km tar la Stretga d'Òtranto che serra il Mar adriatic; quest è lung 700 km tranter lezza stretga e Vaniescha. Cun la vieuta balcanica dals onns novanta èn ils contacts vegnids pli intensivs: «En bargtas d'aria cun in motor ferm main'ins da notg migrants clandestins che vulan star en l'Uniuin europeica (...). Lezza stretga, sco quella da Gibraltar, para in obstachel sin la via vers l'Europa. Ils Talians en las citads maritimas da Puglia e la regiun d'Ancona han la ferma schientscha da viver sin il cunfin (...). Il traffic pertutga daditg era cigarettas da cuntrabanda, ussa schizunt drogas, uffants e prostituidas» (2). Milliuns umans tranter Òtranto ed Ancona sentan mintga di il cunfin.

Il passà da Serbia e Croazia

Percorsch'ins insumma lezza realitad a l'Universitad da Bologna, quella da Montanari e d'auters dus medievists che l'han gidà ad elavurar il manual? En quest datti in'omissiun ed in sbagl davart la riva slava ed albanaisa dal Mar adria-

tic. Montanari: «Las conquistas dals Tircs han fatg fin cun il reginam da Serbia» (p. 265). Segir, ma co èn ins vegni adaquella? L'autur na menziuna tuttina betg l'imperi serb da retg Steivan Duschan († 1355) che cumpigliava era l'Albania, il Cosovo, la Grezia dal nord-vest, Macedonia e Montenegro, pia cun ina lunga fatschada adriatica. Steivan ha sa fatg encurunar «zar» 1346 en Macedonia, ma ses imperi è vegni parti suenter 1355. Uschia ha sultan Bayazit Yildirim (ca. 1347–1403) cun vasals grecs, serbs e bulgars batti ils 15 da zercladur 1389 ina coaliziun manada dal prinzi serb Lazar Hrebeljanovic. Ses uscheditg martiri en lezza battaglia da Cosovo è vegni dechantà en epopeas serbas senza fin che raquantan t. a. «l'entrada da l'armada ortodoxa en il sontg parvis. Dapi lura sa numnan ils Serbs 'pievel celestial'. Lezza visiun cristiana declera co ch'in pievel ha pudì crear cun ina disfatga in mitus uschè enragischà en l'olma collectiva (...). Ils 15 da zercladur è dapi lura commemoraziun naziunala serba (...). Las balladas da Cosovo èn vegnidas in epos nazional che giustifitgescha la pretensiun d'ina Serbia gronda» (3). Lez nazionalissem, vegni ord chadaina en ils onns novanta ed anc adina privlus, pon ins chapir be sch'ins enconuscha il mitus serb da Cosovo. Il sbagl da Montanari, probablamain l'unic en l'entir manual, pertutga la Croazia, pajais adriatic limitrof da Serbia. La chartina «L'Italia suenter il patg da Lodi 1454» (p. 255) porta l'inscripziun: «Domini da Habsburg» sin in spazi che corresponda pli u main a la Croazia e Bosnia-Ercegovina d'oz. Lez intschess, cun in lung toc sper il Mar adriatic, facheva dentant quella giada part da l'Ungheria, dominada da János Hunyadi, guvernatur da Transilvania, enfin a sia mort 1456 e lura da ses figl Mátyás (ca. 1443–1490), retg Mattias dapi 1456, numnà «corvinus» pervi dal corv en sia vopna. Mattias ha t. a. gidà 1481 il figl dal retg da Napoli a stgatschar ils Tircs d'Òtranto. Ils Talians vesan pelvaira plis motivs d'enconuscher il passà da la riva slava ed albanaisa da lez mar e sia retroterra.

- 1) Massimo Montanari, *Storia medievale*. Roma e Bari (Laterza, ISBN 88-420-6540-4) 2002.
- 2) Michel Sivainon en: Pierre Cabanes (ed.), *Histoire de l'Adriatique*. Paris (Seuil, ISBN 2.02.028235.6) 2001, p. 577.
- 3) Michael W. Weithmann, *Balkan-Chronik*. Graz (Styria, ISBN 3-222-12327-6) 1995, pp. 123–125.